

15.07.2026

UKA2026/276

Matumuuna Inatsisartut Suleriaasianni § 33 naapertorlugu aalajangiiffigisassatut siunnersuut manna saqqummiuppara:

Naalakkersuisut UPA2027-mi imeruersaatit puuinut akitsuutip atorunnaarsinneqarnissaanut inatsisini allannguutissanik pisariaqartunik, matumani akitsuutip atorunnaarsinneqarnerata kingunerisaanik akitsuutit pillugit inatsisini allannguutit pisariaqartut ilanngullugit, saqqummiussinissamut peqquneqarnissaat pillugu Inatsisartut aalajangiiffigisassaattut siunnersuut. Peqatigisaanik Naalakkersuisut isertitassatigut annaasassap immikkut naatsorsorneqarnissaanik kiisalu akitsuutip atorunnaarsinneqarnerata isertitassatigut annaasaqaataasullu AI2027-imut ilanngunneqarnissaannik peqquneqarput.
(Inatsisartunut ilaasortaq Pele Broberg, Naleraq)

Tunngavilersuut:

Isumaqarpunga imeruersaatit puuinut akitsuut atorunnaarsinneqartariaqartoq.

Ullumikkut imeruersaatit puuinut akitsuuteqartoqartarpoq. Akitsuut ilaatigut imeruersaatinik imalinnut puiaasanut qillertuusanullu atuuppoq, imeruersaatissanut akusassat paarnallu isserat ilanngullugit. Imummik tunngaveqartumik imeruersaatinik imallit puut akitsuummut ilaangillat.

Akitsuutip ulluinnarni pisiassat akii qaffatsittarpai. Aaqqissuussineq kisiat eqqorneqanngilaq; innuttaasut pisiniarfinni imeruersaatinik pisisut toqqaannartumik eqqorneqartarput.

Kalaallit Nunaanni inuuniarneq akisuvoq. Assartuineq akisuvoq, niuerfiit mikipput, ungasissutsit annertupput unammilleqatigiinnerlu killeqarpoq. Taamaattumik akitsuutit ulluinnarni pisiassanik innuttaasut pisariaqartitaannik akisunerulersitsisut mianersortumik atorneqartariaqarput.

Innuttaasut siusinnerusukkut neriorsorneqarput imeruersaatinut tunngatillugu allannguutit amerlanerusunik toqqagassaqaalernermik, unammilleqatigiinnerunermik akillu appasinnerulernerannik kinguneqassasut. Taarsiullugu akitsuutit, puunut utertitsissutit (pant), akiliutit allaffissornikkullu aaqqissuussinerit arlallit pilersinneqarput, taakkulu naggataatigut pisisup akiligassaanut ilanngunneqartarput.

Isumaqarpunga atuisut nalinginnaasut imeruersaatit puuinut akitsuutit aqputigalugit aningaasalersuisutut atorneqartariaqanngitsut. Inuuniarnermi aningaasartuutit appartikkusukkutsigit, akitsuutit nioqqutissat akiinik toqqaannartumik qaffatsitsisut atorunnaarsinnissaat aamma sapiissuseqarfigisariaqarparput.

Taamaattumik imeruersaatit puuinut akitsuut atorunnaarsinneqartariaqarpoq. Inatsisini allannguutit UPA2027-mi saqqummiunneqartariaqarput. Naalakkersuisut akitsuutip atorunnaarsinneqarnera isertitassatigullu annaasaqaat naatsorsuutigineqartoq 2027-imut aningaasanut inatsimmut ilanngutissagaat naatsorsuutigineqarpoq.

Siunnersuummi makku anguniarneqarput:

1. imeruersaatit puuinut akitsuut atorunnaarsinneqassasoq,
2. puiaasanut, qillertuusanut imaluunniit imeruersaatinik imalinnut puunut allanut ataasiakkaanut akitsuuteqartoqartarunnaassasoq,
3. akitsuut aalajangersakkat allat aqqutigalugit atuutiinnarnissaa pinngitsoortinniarlugu, akitsuutip atorunnaarsinneqarnerata kingunerisaanik akitsuutit pillugit inatsisinut allannguutit pisariaqartut suliarineqassasut,
4. Naalakkersuisut Aningaasanut inatsimmi immikkoortumi “Imeq mineralilik puullu, plastikkimik puussiat ilanngullugit” isertitat qanoq annertutigisut imeruersaatit puuinut akitsuummit pissarsiarineqartarnersut immikkut naatsorsussagaat,
5. akitsuutip atorunnaarsinneqarnera isertitassatigullu annaasaqaat naatsorsuutigineqartoq 2027-imut aningaasanut inatsimmut ilanngunneqassasut.

Kalaallit Nunaanni akitsuusersueriaatsit ulluinnarni pisiassanik pisariaqanngitsumik akisunerulersitsisut pisariaqanngillat. Inuuniarnermi aningaasartuutit appasinnerusut, unammilleqatigiinneruneq akitsuusersueriaaserlu pisariinnerusoq pisariaqartippagut.

Pisortanut aningaasatigut allaffissornikkullu kingunerisassat

Naalakkersuisut inatsisini allannguutissanik suliaqassapput, tusarniaassapput, isertitassatigut annaasaqaat immikkut naatsorsussavaat sunniutillu aningaasanut inatsimmut ilanngutissallugit. § 37 naapertorlugu apeqqummi nr. 129/2026-mi¹ utaqqiisaasumik missingersuutaasoq naapertorlugu suliaq AC-tut atorfiit marluk ukiumut suliffiisa nalingat tikillugu pisariaqartitsisinnaavoq, tassa 1.000.000 kr.-it missaat. Naalakkersuisunit akissut tiguneqareerpat missingersuut nutarterneqassaaq.

UPA2024/115-imi isertitassatigut annaasaqaat ukiumut 85 mio. kr.-it missaanniittutut utaqqiisaasumik naatsorsuutigineqarpoq. FFL2026-imi immikkoortoq annertunerusoq “Imeq mineralilik puullu, plastikkimik puussiat ilanngullugit” 156,983 mio. kr.-inut naatsorsorneqarpoq. Immikkoortoq taanna tamakkerlugu imeruersaatit puuinut akitsuut kisimi pillugu isertitassatigut annaasaqaataasinnaasutut atorneqarsinnaanngilaq. Taamaattumik maannamut missingersuut pitsaanerpaamik atorneqarsinnaasoq tassaavoq ukiumut 85 mio. kr.-it missaat.

Akilerartarnermut Aqutsisoqarfiup akitsuutip akilersinniarnernut, nakkutigineqarneranut ilitersuussinermullu ingerlaavartumik suliaqarnera annikillissaaq. Sipaartussat suli naatsorsorneqanngillat Naalakkersuisullu ilanngaattissat ilanngaatigereerlugit naatsorsuinnerminni ilanngutissavaat.

Namminersorlutik inuussutissarsiortunut aningaasatigut allaffissornikkullu kingunerisassat

¹ [2026-129-paragraf-37-om-emballageafgift-kal.pdf](#)

Nioqqutissanik eqqussuisut, engrosimi tuniniaasut pisiniarfiillu akitsuummik akiliisarunnaassapput tassungalu atatillugu allaffissornermik sipaaruteqassallutik. Akitsuummik atorunnaarsitsineq aallaaviatigut Nunatta Karsiata ukiumut 85 mio. kr.-it missaannik isertitakinnerulerneranut naapertuuppoq. Akitsuummilli oqilisaassinerup suliffeqarfiit atuisullu akornanni qanoq agguataarnissaa unammilleqatigiinnermit akillu qanoq allanngornerannit apeqquteqassaaq.

Suliffeqarfiit allaffissornikkut qanoq annertutigisumik sipaaruteqassanersut maanna paasissutissat tunngavigalugit naatsorsorneqarsinnaanngilaq.

Innuttaasunut aningaasatigut allaffissornikkullu kingunerisassat

Innuttaasut imeruersaatinik akitsuuteqartinneqartartunik pisisarnerminni akinik appasinnerusunik iluaquteqarsinnaapput. Akitsuummik oqilisaassinerup qanoq annertutigisumik pisiniarfinni akinut ingerlateqqinneqarnissaa apeqqutaassaaq.

Inuiaqatigiit aningaasaqarnerat ataatsimut isigalugu isertitassatigut annaasaqaat akitsuummillu oqilisaassineq annertunerpaatigut Nunatta Karsiata innuttaasullu/suliffeqarfiillu akornanni aningaasat nuunneqarnerannik isumaqarpoq. Ilanngaattissat ilanngaatigereerlugit sunniut pingaartumik allaffissornerup annikinneruneranik akitsuutillu niuernerminni aalajangiinernut sunniutaasa annikinnerulernerannik imaqarpoq. Tamanna aningaasanut inatsimmi aningaasalersuinissamut pisariaqartitanut sanilliunneqassaaq. Taamaattumik allaffissornikkut oqilisaassineq eqqaassanngikkaanni inuiaqatigiinnut ilanngaattissat ilanngaatigereerlugit iluanaarutissaq maanna qularnaatsumik naatsorsorneqarsinnaanngilaq.